



Шочмо эл, порылык да чын верч!

Будь готов /

11-ше (3762) №,  
2026 ий 20 март,  
кугарня



0+

# Имде лий

1933 ий 1 февраль годсек лектеш.



## Шошо толеш, сывыным шарен

«Одоким кечын чывылан йүштылаш ситыше вүд уло – шошо вашке толеш», – коча-кована-влак, пүртүсым эскерен, тыгай калык палым ойленыт. Ты кечын, 14 мартыште, ночнок ыле. Шошо толмо шижалтешак: кече кужемеш, игече шокшемеш, лум койын шула. Кундеммышкына шокшо элла гыч түрлө кайык пörтылаш тўналын.

Морко район Нуж-Ключ школышто тунемше-шамыч шырчыкым моткоч вучат.

– Шулдыран йолташна-влакым вашлияш ямде улы-

на. Шукерте огыл труд урокышто туныктышына Валериян Александрович Матвеев дене пырля онам пужаренна, йыгенна, чöгыт дене пудам перкаленна. Тыге 10 мотор шырчык омартам ыштенна да школ кудывечысе пушенгылаш веранденна (снимкылаште). Бнде шырчык-влакын толмыштым да илаш пуремыштым вучена. У суртышт воктене уки гыч укышы юарлен чонештылмыштым куанен эскераш тўналына, – ойла 8-ше клас-

сыште шинчымашым погышо Елена Семёнова.

Тунемше-шамыч шырчыкклан йöнан омартам келыштареныт. Кугу кайык пурен ынже керт манын, вишым изин пүчкыныт. Пырыс але вес тушман деч аралаш шонен, «пörтым» күшкырак сакеныт. Каналташ шинчаш келшыше тоя нергенат монден огытыл. Вашке шулдыран йолташ-влак нунылан сылне мурышт дене тауштаат.

Оля МАЙКОВА.  
Фото-влакым школ архив гыч налме.

# Марий Элыште икымше



«Шиповка юных» куштылго атлетике дене всероссийский тагасымашын республикысе йыжынже шукерте огыл эртаралтын. Тушко мый кумылын ушненам. Түрлө дистанцийым куржталмаште,

снарядым кышкымаште, куржын торашке төрштымаште вий-куатем ончыктенам. Пытартышыже поснак лектышан лийын: 4 метр да 62 сантиметр. Тидыжым шке рекордемлан шотлем. А снарядым изиш начарынак кышкенам, тудым 28 метр да 70 сантиметр торашке кудалтенам. Ончыч 30 метр лийын. Туге гынат шке ийготан-влак коклаште икымше верым налынам (снимкыште). Бнде вий-куатем 24-25 мартыште Саранкыште ончыкташ тўналам. Лектышем дене «atletka\_2013» телеграм-каналыштем палдарем.

*Александра ГУСЕВА.  
Йошкар-Ола, 2-шо номеран школ.  
Фотом еш архив гыч налме.*

## • Увер •

«Волонтёры Победы» всероссийский мер толкын «1418» тўнамбал исторический уш-акыл онлайн-модышым эртара. Тушко 14-18 ияш ўдыр-рвезе-влак ушнен

кертят. Тидлан 3-10 снан командым чумырыман. Мероприятий 24 мартыште лиеш. Модышыш ушнаш манын, игра-1418.pф сайтыште йодмашым пуыман.



## «Илыше» пөлек

Теле каникул деч вара туныктышына мемнан деч йодо: «8 Март пайремлан аваланда пеледышым пөлеклынеда?» Кутырымеке, иктешлымашым ыштышна: пеледышым шке ончен куштена. Эн ончыч кушкын шуэш але уке манын тургыжланышна. Шинча лўдеш – кид ышта, маныт. Келшыше атым муна, а рок школыштак уло ыле. Каланхоэ пеледыш укш-влакым, корневиныш тушкалтен, мландыш шындышна. Кажне пеледыш атыш лўмнам возышна. Кушкыл-влак

вашке виягыч. Пайрем марте вўдым шавышна, мландым пушкыдемдышна, поро шомак дене шыматышна. 8 Март вашеш каланхоэ түрлө тўс дене пеледалте. Шергакан авай-влаклан пөлек ямде лие. Лишыл егна-шамыч дене пырля спорт тагасымашым эртарышна. А вара «илыше» пөлекым кучкытышна (снимкыште). Авана-влакым ырыктарен куандарышна.

*Таня МИХЕЕВА.  
Татарстан, Агрыз, Буймо.  
Фотом школ архив гыч налме.*

## Российысе увер

«Цифровой ликбез» проект почеш 1-11-ше класслаште тунемше-влаклан «Безопасное общение в мессенджерах» урок эртаралтеш. Налме шинчымашым «Мах» мессенджерысе «Сферумышто» тергаш лиеш.

Самырык-влакын «Герои Отечества» Петербургысо исторический форумышт радамыште түрлө конкур эртаралтеш. Тўн теме – «Российысе Империйын икымше Кугыжаныш Погынжын пашам ышташ тўналмыжлан – 120 ий». Тўрыс увер – [ano-geroiotechestva.ru](http://ano-geroiotechestva.ru) сайтыште.

12-18 ияш ўдыр-рвезе-влак «Мечты о будущем» всероссийский видеоэссе конкурсыш кум ег дене ушнен кертят. Сенгышыш лекшым Москошко ўжыт. Тичмаш увер – [dream.russia.ru](http://dream.russia.ru) сайтыште.

## Марий Элысе увер

Йоча, туныктышо, ача-ава-влак, «Навигатор йолташ» регионисо марий йоча модыш конкурсыш ушныза. Йодмаш ден пашам 11 апрель марте колтыза. Кумданрак [vk.com/navigatoridetstva12](http://vk.com/navigatoridetstva12) ссылке дене лудса.

«Кугу Какшан» заповедник «Гнездовья» республикысе усталык конкурсым увертарен. Шулдыран йолташ-влаклан пөртывм 4-18 ияш ўдыр-рвезе-шамыч темлыме схеме почеш ыштен кертят. Тўрыс увер – [b-kokshaga.ru](http://b-kokshaga.ru) сайтыште.

18-27 мартыште рўдолаште «Йошкар-Ола театральная-2026» фестиваль эртаралтеш. Йоча-влаклан келшыше ятыр спектакльым ончыктат.

# Школ – ончыкылыклан негыз

Марий Эл Республик мучко 254 школ уло. Нуно икте-весе деч ойырте-малтыт гынат, кажныштыже тале туныктышо-влак тыршат. Медведево район Турша тун школыштат тыгай педагог-шамыч пашам ыштат. Валентина Ивановна Черепанова (**снимкыште**) 30 ий наре марий йылмым, литературым да ИКН-ым туныкта.

– *Марий йылме ден литератур уроклан арняште пеш шагал шагат ойыралтын. Садлан йылмым келгын пальше йоча-влакын чотышт ий еда шагалемеш. Туге гынат тунемаш тыршат. Кумыландаш тюрлө йоным кучылтам: модыктем, «Марла ойлаш тунемына» мультурок-шамычым ончыктем, школ тоштерыш коштыктем,* – ойла туныктышо.

Марий йылме кабинетыште поян тоштерым келыштарыме. Экспонат-влакым погымаште ончычсо школ директор-влак Г.Н.Марычева ден В.В.Коротков тыршенят. Умбакеже ты пашам В.И.Черепанова шуен. Кызыт тушто школ илыш, кундемын эртыкше нерген ятыр увер аралалтеш. Посна верым Кугу Ачамланде сарыште лийше талешке-шамычлан да СВО-што элым аралыше сарзыен-влаклан ойырымо. «Марий вургемын, марий тўрын вашталт толмыжо» ончер Медведево кундемысе тувыр ойыртем дене палдара.

Турша школын директоржо – Татьяна Михайловна Туманова.



1-9-ше класслаште 33 йоча шинчымашым пога. Школ илыш нерген директорын воспитаний паша шотышто алмаштышыже Ольга Анатольевна Рыбакова палдарыш:

– *Йоча-шамыч «Движение Первых» толкынын чолга участникше улыт. Уш-акылыштым да вий-куатыштым тюрлө конкурсышто тергат. Школышто кугу тўткышым патриот пашалан ойырена. Маскироватлалтме сеткым пидына, окоплык сортам ямдылена, гуманитарный польшышым погена. СВО-шко колтымо «Сеҥымаш полотном» шукерте огыл мўнгеш пўртылтенят. Тушан сарзыен-влак кидпалыштым пыштен колтенят. Йоча-шамыч тудым моткоч аклат.*

Ты школышто руш йылмым да литературым 26 ий туныктышо Лилия Владимировна Иванова 2024 ий гыч эше директорын воспитаний шотышто советникше улеш. *«Икшыве-влакым эн ондак шочмо йылмым палаш, тўвырам аралаш, калык йўлам шуктен илаш туныктыман. Ту-*

*нам нуно шке республикым да Российым йўратыше да аклыше еҥ лийыт. Мемнан ямдылыме «Йошкар-Олан сўрал вершўржў» мемо модыш рўдолам шымлымаште моткоч полша,* – ойла Л.В.Иванова. – *Йоча-шамычлан марий сынан пайремла пеш келшат. Тувырым чиен мурен-куштымашке кумылын ушнат».*

Школыш пурымеке, ўрыктарыше да куандарыше сўретым вашлият. Омсам, тенгыл-влакым, эсогыл Россий гербым пу гыч пўчкeden ыштыме. Тиде верысе кидмастар-влакын, ончыч тышколышто пашам ыштыше-шамыч Л.А.Зайцевын да В.В.Коротковын, пашашт. Нуным коллегышт ден йоча-шамыч порын шарнат.

**Оля МОШКИНА.**  
*Авторын фотожо-влак.*

## Тўшкан модаш сай

Марий серызе Иван Одарын «Таргылтыш» ойлымашыжым шукерте огыл лудым. Тунамат, кызытат ме, йоча-влак, тюрлө модыш дене модына. Ялы-



се икшыве-шамыч иктаж 5-6 еҥ погынена да шылын модаш йўратена. Эн ончыч кычалшым ойырена. Тыгодым тюрлө шотлеммутым кучылтына. Вара тюрлө вере шылын пытена. Лач «Таргылтыш» ойлымаш семынак лектеш. Южгунамже йоча-влак вес урем гычат толыт. Нунат модмашке ушнат. Тўшкаште чот сай. Модашат онгайрак.

**Виктория ИВАНОВА.**  
*Морко, Коркамова.*

## Ече дене

Таче сылне пеш игече,  
Угыч школыш касна.  
Физкультурыш

ече дене

Куаналын лектына.

Тиде курык гычын

талын

Ме черет ден волена.

Кумылемже утыр нўлтын,

Спорт моткоч мылам келша.

**Ангелина СМЕРНОВА.**  
*У Торвьял, Тошто Торвьял.*





Физкультура

## Модмаште шуаралтына

Уремысе спорт да модмаш-влак жапым веселан эртараш полшат, тазалыклан пайдам кондат, вийым да чулымлыкым ешарат. Йоча-влак яндар южышто юарлаш йоратат.



**Маша ТЮРИНА, У Торъял:**

– Авам роликым пӧлеклен. Ты ораван йолчием дене кудалышташ моткоч келшен. Тунемме годым ятыр гана камвозынам гынат, умбакыже тыршаш кумыл йомын огыл. Кызыт транспортем кана, лум шулен пытымеке, вигак «кычкем».



**Алёна ЕГОРОВА, Курыкмарий, Пызыкныр:**

– Физкультур урокышто чӱчкыдын волейболла модына. Мечым кышкылтме годым писе лийман, ваштареш шогышо командым эре эскерыман, правилым сайын палыман.



**Полина АНТОНОВА, Оршанке, Кугунур:**

– Йолташем-шамыч дене куржталаш кумылан улына. Садлан чӱчкыдын поктылын модына. Тиде писылыкым, чытышым виянда. Вӱдышым ойырыммо годым шотлеммутым шарналтена.

Оля МАЙКОВА ямдылен.  
Авторын фотожо-влак.

# Самырык ечызын куанже

Ечым чиен, пушкыдо лумым тӱргыктен мунчалтыме дене ылыжше йывыртмашым ик мут дене от умылтаре. Танасымаште спортсмен-влакын кумылышт эшеат чот шолеш. Диана Журавлёванат (снимкыште) спорт илышыже тӱрлӧ танасымашлан поян. Самырык спортсменке Волжский округысо Памар школышто 11-ше классыште тунемеш. Диана ече умбаке икымше классыште тунеммыж годымак шогалын да тунамак икымше сенымашыш шуын.

Талантан ӱдырым Эрик Васильевич Кудрявцев шекланен: тренировкышто полшаш тӱнгалын, танасымашлашке каяш кумылан ден. Туддене пырля Диана Первоуральск олаште эртаралтше «Пионерская правда» газетын призше верч всероссийский танасымашке миен коштын. Кызыт спортсменке Сергей Анатольевич Кугергин дене ямдылалтеш гынат, икымше тренерже эреак полша.

Диана Марий Элыште иктагашыже-влак коклаште эн виан спортсменкылан шотлалтеш. Ӱмаште Татарстан Республикасые Заинск олаште эртаралтше танасымаште ече дене спорт мастерыш кандидат лумым пенгыдемден.

– Эрым зарядке гыч тӱнгалам: куржталам, капкылым виандыше упражненилдам ыштем. Урок деч вара тренировкыш лек-



там. Ече спорт дене кылдалтше илыш мыланем келиша. Тӱрлӧ кундемшыште, олаште лийынам. Архангельск областысе Малиновка ече рӱдершыште эртаралтше кенежымсе сборым эн порын шарналтем. Тушто мый Россияысе юниор сборныйын тренерже-шамыч дене палыме лийынам, – оила Диана.

Шукерте огыл Диана Виче кундеммысе Кирово-Чепецкыште эртаралтше Юл кундем федерал округысо спартакиадыште кумшо верым сенген налын. Ӱшанена: тиде медаль самырык ечызылан у кӱкшытыш шуаш ӱшаным пуа.

Катя СЕРГЕЕВА.  
Фотом еш архив гыч налме.

## Лӱдде мунчалтем

Ече дене мунчалташ эр тунемынам. Изам-влак сай примерым ончыктеныт. Нуно пеш талын коштыныт, мыйынат вараш кодмем шуын огыл. Кызыт курык гыч лӱдде водем, курык вуйышкат тыманмеш кӱзем. Тений класс дене ий еда эртаралтше танасымашке ушненна (снимкыште). Икымше классыште веле тунемына гынат, ече дене ӱшанлын мунчалтена. Шке тагашем-влак коклаште икымше верым сенген налынам. Туныктышемат мокталтен: «Пеш молодец улат. Тыгаяк писе, виан лий. Сенгымашет дене умбакыжат куандаре».



Фёдор АЛЕКСАНДРОВ.  
Морко, Арын.  
Фотом школ архив гыч налме.



Лаштыкым  
Христина  
АЛЕКСАНДРОВА  
ямдылен.



## «Зардон» йўлам арала

Удмурт-влак, тўн шотышто, Удмурт Республикыште илат, тыгак – Татарстаныште, Башкортостаныште, Пермь, Свердловск, Виче кундемлаште. Марий Элыштат Марий Турек районышто шке верыштым муыныт. 2021 ийыште шотлымо почеш, кундемыштына 1348 удмурт ила.

Марий Турек район Кугу Карлыган селаште йылме, йўла кузе аралалтыт? Тиде йодышлан вашмутым муаш манын, верысе тўвыра пёрт вуйлатыше Н.Ю.Иванова (снимкыште икымше) дене кылым быштышым.

– Чаманен каласаи логалеш, удмурт калыкын чотио иземеш. Школьн коштыи йоча-влакат шагальнже одо йылме дене кутырат. Еш ялыште ила, ачажат-аважат удмурт улыт гын, йылме эше аралалтеш. Школьншто йылмым факультатив семын веле туныктат. Виян туныктышо Елена Львовна Кандакова урокым ондайын эртара, одо серызе-влакым вашлий-



машке ўжеш. Карлыганыште удмурт йўлакат жаплена. Ик эн йўратыме пайремлан «Акашка» (Кугече) шотлалтеш. Йоча-влак ял мучко муным поген коштыт, вашла пайрем дене саламлат. Ме тўвыра пёртышто ий еда ты пайремым эртарена. «Акашка» годым кугезына-шамычын ожно модмо модышышт дене модыктена. «Зардон» калык фольклор ансамбль дене ты пайрем йўла дене палдарыше фольклорно-обрядовой композицийым ончыктена. Шукерте огыл ты паша дене «Кугезе возж»



республикысе фольклор фестивалышке ушненна да Гран-прим сеҥен налынна.

Тыгак сценныште салтакыш ужжатымашым, «Шорт миськон» (Мытьё мотков) йўлам модын ончыктена, – оила Наталья Юрьевна.

Йылмым, йўлам арален кодмаште «Зардон» ансамбльын надырже, чынжымак, кугу. Кызыт 2-шо класс гычак ўдыр-рвезе-влакым ансамбльыш налыт. Одо-влак дене пырля тыгак марий, руш, татар йоча-шамыч коштыт. Икте-весын йылмышт дене мурат, куштымашым шындат. Чылан келшен, икте-весым умылен илат.

### • Калыкмут •

- ❖ Йолташ дек кайыме кужу корныжат кўчыкын чучеш.
- ❖ Капка ончылно тушман гын, аралаш пўтынь калык лектеш.



Удмурт йоча-влак пиалан улыт. Нунылан да самырык-шамычлан «Зечбур!» (Салам лийже!) газет лектеш. Тўрлө статья деч посна тушто ўдыр-рвезе-влакын пашаштат савыкталтеш. Ик эн чолга юнкор – Удмурт Республикысе Завьяловский район Пычановский школышто 5-ше классыште тунемше Артём Мензарипов (снимкыште).

## Изи Зечбурка

Моло йолташыже-влак одо йылме дене огыт кутыро гынат, рвезе мутланаш ок вожыл – мөнгешла, кугешна. Шочмо йылмыжым виянгдаш манын, «Зечбур!» газетышке тўрлө онгай ситуацийышке логалмыж нерген ойлымашым воза. Чолган серкален шогымыжлан, артист койышан улмыжлан Артёмлан газетын лўмгече пайремжым вўдаш ўшаненыт. Тудо тушто Зечбуркан рольжым модын.

– Эргымлан одо калыкын тўвыраже да йўлаж нергенат пален налаш онгай, садлан тўрлө пайремышке, мероприятийышке чўчыкдын пеленем налам. Удмуртийыште «Пичи Чеберайёс но Батырьёс» (Изи мотор ўдыр да патыр-влак) регион-влак кокласе йоча конкурсы, «Чыжы-выжы-выжыкыл» (Родо-тукымын йомакыше) йоча фестиваль

эртаралтыт. Пельмень, табань, перепечи калык кочкышлан шотлалтыт, садлан нунылан пўлеклалтыше пайремат уло. Ижевск олаште «Пельменьфест» фестиваль изижымат, кугужымат иквереш уша. «Табань Fest» фестивалыште табань кочкышлан кугу тўткышым ойырат, – каласкала Артёмын аваже Екатерина Анатольевна.

Одо-влак поян тўвырашт, Байгурезь пўртүс памятникышт, кугу курыкышт, кок тўжем утла пашышт, поэт-шамыч Ашальчи Оки, Кузубай Герд да моло уста ен-влак дене кугешнат.

Артём Мензариповат тидын нерген изинек пала да, кугурак лиймекше, газетышке возаш шона.

Фото-влакым ансамбльын да ешын архивлаж гыч налме.



# Öрыктарыше вер

Планетарий ожнат лийын, но кызит тудо моткоч вашталтын. 2025 ийыште тўнямбалне икымше планетарийым почмылан 100 ий темын. Мыланем Озан оласе планетарийыште лияш пиал шыргыжалын (снимкыште). Тушко иквереш тунемме йолташем-влак дене пырля миенна. Планетарий кажне йочан кумылжым савырен. Астрономийым тунемаш таратен. Мыланна кава, шўдыр-влак нерген пален налаш онгай лийын. Экскурсий шуко жаплан шарнымашеш кодеш.



**Василиса ЕРШОВА.**  
Йошкар-Ола, 10-шо номеран школ.  
Фотом еш архив гыч налме.

**Историйым шерталына**  
1915 ий 22 мартыште руш войска Австрийысе Перемышль орым ятыр жап авырымаште кучымо деч вара сепен налын.

## Еш дене

Ах, игече пешак леве,  
Мардежат уке йоршеш.  
Лектына уремыш тева,  
Лумым эрыкташ күлеш.

Лум моткочак таче шуко,  
Ме кунам пытарена?!  
Таче еш ден кече мучко  
Рўж пашам ме ыштена.

**Игнат НАГАЕВ.**  
У Торъял, Тошто Торъял.

### Изи озавате

## Тамле печене

**Кўлыт:** 400 г ложкаш,  
200 г сакырложаш,  
300 г ушкар уй,  
3 муно.



Сакырложашым, ушкар уйым да муным овары-мешке лугыза, ложкашым ешарыза. Руашым кондитер мешакыш пыштыза. Печене семын келыштарен, вигак салмаш темдал лука. 200-220 градус марте ырыктыме духовкыш 10 минутлан шындыза.

## Шошо

Сотнур кундемшыкына öрыктарыше пагыт, шошо, тольо. Пўртўс кум тылзе тамле омо дене мален, а кызит чыла помыжалтеш. Кече утларак ырыкта, лум шула. А южшо могай яндар! Вашке пушенгылаште лышташнер-влак почылтыт. Шижынат огына шукто, чодыра ужар сывыным чиен шогалеш. Шокшо элла гыч кайык-влакын толмыштым вучена. Сылне мурышт дене мемнам куандараш тўнгалыт. Мыланем шошо келша.

**Аня ПАВЛОВА.**  
Волжский, Сотнур.


### Тумто

- ? Телым шып, шошым чарныде шурга.
- ? Ош алаша коремыш куржеш.
- ? Шошым унчыли шочеш.

### 20 март – пöрткайыкын тўнямбал кечыже.

Калыкмутым мучашле.

- Шочмо пыжашыште пöрткайыкат ...
- Жап пöрткайык гай, мучыштарет – ...
- Пöрткайыкат айдеме деч посна ...
- Пöрткайыкынат шўмжö ...



- Кö пöрткайык деч лўдеш, тудо тарым ...
- Изи кайык эре ...
- Лўдшö пöрткайык дечат ...
- Пöрткайыкым арва дене ...

**Вячеслав СМЕРНОВ** ямдылен.

М.ШКЕТАН ЛўМЕШ МАРИЙ КУГЫЖАНЫШ ДРАМЕ ТЕАТР

**20 март 18:00**

Виктор Розов  
**ЧОНЕШТА ТУРНЯ КАШТА**  
Драме  
ВЕЧНО ЖИВЫЕ  
Рекламе.

12+

«Йошкар-Ола театральная» фестивал



0+

Марий Эл Республикысе «Марий Эл» увер агентстве» КАУ.  
Директор – Е.И.КУЗНЕЦОВ.  
Тўн редактор – А.Н.ГРИГОРЬЕВА.

Индекс П4696.  
Тираж 1500 экз.  
Заказ  
Формат – А-4-8.

**Учредитель-влак:**  
Марий Эл Республикысе Тўвыра, печат да калык-влакын пашат шотышто министерстве, Марий Эл Республикысе «Марий Эл» увер агентстве» КАУ.

**Редакций да издатель:** Марий Эл Республикысе «Марий Эл» увер агентстве» КАУ, 424006, Йошкар-Ола, СССР Вооружённый Вийын 70-ше идалькыше урем, 20-шо пöрт. Тел. 8(8362) 45-22-82.

Газетым редакцийыште погымо да верстатлыме, «Марий Эл Республикысе Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112.

Печатьыш пумы жап – 14-00, фактически – 13-00.

Авторын да редакцийын шонымашышт тўрлö лийын кертыт. Серыш-влак мөнгеш огыт колталт. Ак – кутырен келшыме почеш.

[https://vk.com/yamde\\_lii](https://vk.com/yamde_lii)  
<https://t.me/yamdelii>  
[yamde\\_lii@mail.ru](mailto:yamde_lii@mail.ru)  
[yamdelii@mediamari.ru](mailto:yamdelii@mediamari.ru) (автор-влаклан)  
Сайтын адресше: ямделий.рф

Газетым Кыл, информационный технологий да массовый коммуникаций сферым эскерыме шотышто федеральный службын Юл кундем федеральный округысо управленийыште регистрироватлыме.  
Номер – ПИ № ТУ52-01404, 2023 ий 22 сентябрьыште пумы.

У конкурс



Злата ПЕТРОВА.  
Кужэгер, Рум Шой йочасад.



Марк ПОЛУШИН.  
Советский, Кодам школ пеленысе йочасад.



Юлианна ИВАНОВА.  
Звенигово, Кужмарий.

Эжуклан Пампалче  
деке миен шуаш  
полшыза.




Акростих


Вүдшор

Волактүр гыч вүд йога,  
Ўдыр семын койышлана.  
Дра-та-та да дра-та-та,  
Шортынак лумет шула.  
Ончо: йырваш мотор пеш,  
Рынак шошо ошкылеш.  
7-ше классыште тунемше-влак.  
Волжский, Сотнур.

Келшыше ужашым  
чыялтыза.



Шотлыза.



Сүретым ончен, пийым келшыше  
түс дене чыялтыза.

